


水



求是堂詩集卷十三

道山集

涇縣 胡承珙

墨莊

余孝女詩

女名酉州四川崇慶州人父以事繫獄母赴闕訟
及歸道病死父遂遣戍女時始孩依祖父母以活
至是年十有一痛其父之不反祖父母病且老無
人侍養泣丐其舅某攜之間關至京師訴於朝
有 詔立釋其父

子規夜叫千山血父戍不歸兮母長別兒生嬰媿兮才數
月解兒不識父與母兮恃有翁與姥兒恃翁姥兮翁姥安



怙上蒼天兮下黃土四無依兮零丁孤苦二解江流滔滔兮

父終不歸兒齒已毀兮重親日衰側身東望兮肝腸摧三解

人言蜀道難儂道長安邇欲呼蒼天兮敢憚死攜兒者誰

兒舅氏泉濺濺兮石齒齒前狺狺兮後青兕驚奔而相避

兮避此十一垂髻弱女子四解手搯搯攀天闔雞鳴一歌天

已聞吾

皇仁德邁漢文金雞立下還爾親五解君不見龐娥親叔先

雒飢蛟可餌虎可縛豈有父罪不可釋施灼切嗚呼壯夫不

如女子弱即今莫道生女惡六解

雪夜同人集魯服齋垂紳編修寓次東坡聚星堂禁

體詩韻

三館校書如掃葉歸途已積漫街雪天寒晷短行罷休女

病妻嗥坐愁絕凌兢瘦僕履欲穿篤促良朋簡重折深窗

猶訝燈光搖閉門且任車轍滅戰急風威虎初吼詩成筆

力鯨可掣惟將冰淨藏胸襟不借酒紅覆面纈山陰挈舟

興尚慵洛陽掃門意詎屑過眼烟雲蒼狗幻回頭歲月飛

鳥瞥半條燭在須盡歡萬戶衣單向誰說吾儕冷落何足

悲吐氣猶銷布衾鐵

後十日復雪同人集何昭甫彤然編修寓復次前韻

歡餘有似風墮葉事往更如鴻印雪恰逢十日相招邀酒

債詩逋兩忙絕我來早令坐席温公等遲疑展齒折新篇
案上騰墨光舊積牆陰成泡滅高燒炭獸敵寒噤穩押簾
犀任風掣衝泥已辦擎履箱行酤何妨溼衣纈判教歲事
如棼絲且聽談言落霏屑今宵冷結堆瓏玲明日春融去
飄瞥天情寒燠誰復知人事合離那堪說是日程次坡陳
潼溪以事不至
君看滑達六街泥碾盡輪蹄幾州鐵

次韻魯服齋以尊甫生日感懷詩索和

囊粟東方本善諧却緣負米憶天涯夢雖境幻歸終好詩
到情真語自佳千里浮雲勞盼望百年長日易推排因君
更觸臯魚淚何日方申誓墓懷

送家研農觀察稷之任江蘇

官到江南便有情況兼晝日錦衣行登山久識邛峽險君
舊
官川飲水惟憐建業清一絹家風開篋看尊甫曾任
江右觀察六朝
詩思捲簾生新亭舊院曾題句好向紗籠覓姓名

消寒雜詠

斗室寒能辟垂垂率地長動搖犀押響留貯鴨爐香舊物
防祛篋穹廬想擅場却嫌深閉置三日令人狂擅簾

布被藤牀外從添韻事誇光能欺柳絮夢不離梅花曉捲
連書幌宵支借畫叉嬌兒曾惡卧踏裂一痕斜紙帳

詎有頭綱賜聊回舌本甘酒人輸大戶家具剩都籃活火

煩妻俟樵蘇供客談只愁終夜醒無夢到江南煎茶

盡日依綈几叢殘信手鈔蕪田宜火種鑿管費冰敲春帖

酬鄰乞冬烘藉石交十年元尚白無意解人嘲炙硯

絕妙冰壺傳年年上食單生涯園地少身世甕天寬病久

虛中饋珍誇敵大官故人書斷絕聊自勸加餐醃菜

寒谷聞吹黍陽坡記種瓜果然開頃刻不必養萌芽天力

猶輸巧人情祇競奢獨憐巖桂冷未解鬥繁華塘花

棐几小牕幽凝塵積寸留埋頭惟故紙潑眼勝新油鏡影

圓初嵌花枝薄欲浮何人戲窺戶吾室盡天游玻璃紙

火作溫磨氣羹傳骨董名年光然桂盡世味夢梁輕團坐

全家共招邀近局成何須問殘芋吾自斷吾生楫拙爐

何紹甫三十初度

一夢霓裳歲月遷只君三十尚華年能令沈范同傾倒肯

與王盧角後先御柳詩篇藏篋裏官梅消息到尊前食單

自付門生議不用虛誇費萬錢

家山大好憶靈谿入洛才華髮乍齊次道合傾家釀供參

元聊借市廛棲去年君寓舍燬于火浮沈幾載依金馬定省他年祀

碧雞尊甫官滇南州牧記否慈恩高塔上姓名猶是阿孩題

何須奔走苦勞形瓦卜筵占枉乞靈直到公卿頭尚黑儘

耽編簡汗終青曲中靜聽歌金縷花下狂呼倒玉瓶任使

揚雄猶執戟莫因雨立羨諸伶

簡點蘭盟有所思七年我亦長微之

見白樂天集

雞豚冷局尋

常共後鶴移文報復遲休愛東陽雌霓句

予不喜作試帖詩偶作輒爲君

所賞且邀崇敬牡丹期頭銜一例神仙籍黃髮青山究屬誰

團扇曲爲家玉鑊孝廉賦

皎皎天上月團團手中扇月影那如扇影圓扇邊恰覩芳
姿面誰家良夜洞房開新婦當筵拜客回別有青衣擎燭
侍居然紅杏出墻來客中杜牧情無奈忽發狂言驚滿座
楊柳堪爲鶯鶯棲蓮花肯使淤泥浣此時含笑獨鍾情此
際盈盈已目成便隔短屏盟息壤贈將圓扇當坤靈蘇姑

好夢何容易驀聽風波起平地郭璞空拋赤豆符羅敷早
有紅絲繫可憐花好是重儻欲嫁東風難自媒主人只愛
金縷篋薄倖先輸玉鏡臺漫言墮甌無全理在山百折終
清水錦瑟能令商隱憐玉簫甘爲韋郎死薄命真疑是落
花一番蕉萃委塵沙柔腸已共機聲斷淚面難將扇影遮
綠碎紅摧休苦怨世間尚有回心院褰帷真個欲銷魂對
酒猶應喚如願依然璧月照鴛棲飛墮懷中不用梯取將
紈扇分明在費盡羅巾宛轉啼蕭郎固是牽情重此段纏
綿信人種一枝只合倚雲栽萬卷聊將當書擁生香活色
想嫣然芍藥豐臺也可憐篋中尚有班姬製莫使秋風嘆

棄捐

君先已買妾京師

臘月八日劉錦門世標縣尉饋冬筍

殘年事事動鄉心鄉味蟠胸更不禁
久客半牀思煮簞故人一束抵兼金
風前糜粥香先透雪後園林夢欲尋
他日天涯倘相見可無千畝擴吾襟
時君將謁選出都

贈張阮林聰咸孝廉

廣眉高髻逐時新閉戶知君不染塵
獨抱膏肓成左癖注君

有左傳辨杜更拈香瓣拜經神
名山有約應千古陸海論交竟

幾人料理圖書須互勘移家何日作比鄰
前將移寓與君近既而不果

贈家竹村培翬孝廉

何論四海與彌天獨抱冬心守一編
大雅材堪芸閣選小

同經本禮堂傳令祖樸齋先生熟精三禮君具有家學公車嬾削三千牘
行

篋常攜十七篇為問蘇湖二齋後
家風誰克繼前賢

送星子令鄭夢白同年

白髮催年少緇塵變舊顏因君話疇昔
令我夢匡山宦味烟雲釀詩情草木閒
何緣託飛鳥竟渡落星灣

把酒一為別將詩重贈行多情量帶減
無物壓裝輕春水圍彭澤青山擁郡城
樵風如有便時為寄賢聲

送劉縣尉之任貴州

裘馬少年場翩翩馬上郎十年客京雒
一障去殊方苗市

燒蘆酒居人拜竹王莫嫌棲枳棘神劍詎終藏

朱蘭坡編修招同看花城西諸寺歸飲寓園次東坡

和李公擇梅花詩韻

春光纔過半念此怍欲動日月如兩丸不堪供撮弄高枝
英已繁荒徑地猶凍物理誰能齊靜觀息羣鬪故人念我
寂良游戒騎從心隨鐘梵清目與雲鳥縱古佛不拈花無
言學翁仲踏青例有詩歲作蓮座貢陳迹不可尋流光倍
堪重日午行歸休園花引禽哢迎人競含笑不飲慮遭諷
賭拳快技癢截餅忘齒痛萬點隨風飄稍遲積成雍年來
困塵土梨雲不同夢一枝楠未安名花那暇種猶賴素心

人時時接吟鞞細數十年中何翅百回共難隨浩蕩鷗且
依觚稜鳳海棠高作巢丁香密成洞爲囑春少留還來卧
抱甕

立夏後一日同人集尺五莊

幾年不踏城南路手種楊枝已成樹城頭日日揚風沙捲
盡飛花并飛絮溪流滙處饒清陰初日已透幽篁林並階
紅藥半開放被徑綠莎時淺深後先踵至雜賓主啼鳥窺
人幾回數解衣掛樹驂繫扉拂面游絲細縷縷每逢水竹
生清新煮茶燒筍皆可人不覺簷前轉白日祇疑世上猶
青春興酣書畫一時作數人據案羣跛脚相看各欲騰龍

蛇此間本自成邱壑一技專門亦足傳百年幾輩能行樂
憑軒百感來蒼茫園林易主池臺荒何況漂萍落人海風
前聚散誰能詳城鑰催歸行復止畢竟山林勝朝市君不
見城中槐榆枯欲死此間尚有藤花紫

朱節婦詩

庭前種蓼後種茶誰其食者婦與姑姑無夫子亦殂婦無
夫嗣藐孤熒熒兩世皆孀嫗姑飢待婦舖姑痿恃婦扶夏
炎就陰冬就爐賢哉婦真影響如廿年不忍離須與姑何
腴婦何癯姑髮未變婦髓枯入房進盥仆復蘇熒熒血淚
沾襟襦貞魂渺矣目猶視事姑未終身已死嗚呼蒼天竟

如此

萊州傅翁百歲歌

世人何必求神仙披裘帶索可以全其天况復平生有至
幸

四朝盡值昇平年大勞小勞東海邊蓬萊清淺在眼前偶
然策杖試遊戲觀者定疑松喬與偓佺吳興沈郎不解事
史筆無端志符瑞豈知星雲麟鳳非禎祥人間自有真靈
異君不見傅家百歲翁不服金丹不導引至今鬚眉如雪
顏如童

朝雨齋中獨坐

一雨萬氛屏澹然生靜心庭樹翳朝景几席羅清陰坐久
愈蕭瑟滴滴葉上音車馬寂不來始覺門巷深十旬困炎
旱端憂渺難任渴煩一以解爽氣浮前襟晴途尚嬾出况
此淤泥侵心空篆烟繞念息齋磬沉古人滿青史散帙聊
相尋

雪夜紉兒圖爲蘭坡賦

元雲沉沉低古屋曲巷燈光大如粟中有紉兒借宿人祇
緣爺病妨兒哭從此兒啼爺不聞隣雞聲裏往來頻當時
爛睡投懷暖詎識慈親手足皸槎枒枯樹門邊直生子寄
巢空格磔染盡啼鵲口血痕積雪模糊不能白可憐三月

成孤雛不眠依舊勤宵哺殘燈耿壁雪灑牖每聽啼聲清
淚枯雛今已化梧岡鳳却憶南枝更思痛風雪天涯久倚
閭玉堂夜夜牽歸夢一回展卷一潸然往事淒涼滿目前
燕山十月風如箭那及圖中特地寒

謝家孝廉竹村乞王子卿侍御寫春山圖見贈並柬

侍御

一重春雲一重樹繚白縈青莽回互就中點破蒼苔斑人
在溪山最深處靜聽飛泉疑有聲細看峭壁愁無路太清
御史乘花驄偶搖霜筆回春風浮嵐訣得大癡妙疊嶂吟
思小謝工翠螺白紵恍在眼除却江南無此峰

侍御家我
蕪湖

家敬亭雲君家大障麓

竹村近以三天子都考見示謂即君鄉大障山云

相逢同

訂山水經架上奇書互抽讀
竭來移贈一幅藤恍如坐我
奇峰三十六衣上何妨塵土
緇夢中各有家山綠人生豈
必爲蕤鱸茶筍春山好荷鋤
絕頂茅亭如共縛與君常看
翠屏圖

酬張孝廉辱贈之作

青袍何必誤儒生讀罷新詩見古情
祇惜無人知賈誼謾勞有道望陽城
眼前流水隨行止身外浮雲豈重輕
他日印須終有屬論心杯酒且同傾

晨起至法源寺訪王太守秋池

九楚

同年即送其詩

往雄縣

雨歇生早涼秋光滿西郭寺門深且寂
綠樹菴油幕齋磬隔院沈佛香上衣著
故人濟時彥瀟灑脫塵縛暫緩懷郡符
精廬此棲託習靜觀朝華耽吟和宵鐸
使材稱屐履藏用歛銚鏹即此悟治理
清風滌煩爚昔政懷鳴琴今猷企卧閣
如何磊砢松羌獨愛樛柞清言契如蘭
醇味和以芍偶從桑下游愧乏霞上作
相期更有在談藝且爲樂僧房看打包
近游試腰脚燕南美風景碧淀鏡光鑠
夕照開笈簪殘煙帶略射鳧絃竹弓拾
蟹躡芒屨今夏屯甘膏三輔困炎灼水
鄉獨無急稻田行可獲長堤送矯鷗廣
場聽

喧雀豈惟陶物情兼用識民瘼而我懷友心秋深感搖落
西山空爽氣北海闕疏酌行行速來歸黃花有佳約

題李蘭卿

彦章

舍人薇垣歸娶圖

山抹微雲舊擅場繞牀曾弄荔枝香劉郎漫說天台路九
曲仙山好壻鄉

子晉吹笙上玉京藍橋遲爾見雲英祇緣一席紅綾餽羸
得寒多翠被生

雙烟一氣博山霞新月穿簾蕩影斜淺碧籠裙深紺袖夜
闌疑對紫薇花

簪毫收拾鳳池劾歸掃春山看曉妝恠底羣鷗皆粉色勝

他七十二鴛鴦

粉鷗見
閩小紀

韓桂舫中丞入覲辱示詩稿即次集中見寄原韻二
首題後

問訊歸朝節天南得報書待迂嚴尹騎還掃子雲居劒珮
隨阿鳳詩篇掣海魚平生數知舊歲晏孰華予
每懷湛露寵還切望雲心折柳聞高調攀棠想舊陰清秋
搔首短元氣沁脾深却笑東山客徒工擁鼻吟

贈李刺史元方

苞

瑣骨珊珊老更道三刀舊夢在邊州縈雲路入青天細積
雪山連太白秋酒盞尚如鬢舍冷詩編長使故人留

君舊
任學

博又嘗輯
洮陽詩集
料應盡攬巴川勝不為啼猿費劇愁

蠻童渝女繫謳思為政風流譜竹枝頻見旄牛通塞外祇

騎羸馬到京師十年喻蜀猶留檄三輔探丸孰出奇時滑縣賊

匪未且與論文同把盞看君談笑却熊羆

題文姬教子圖

狐襟貉袖貂襜褕風沙撲簸容顏殊賢王會獵未歸帳鵝
鵝哺子羣相呼寄書那得託鴻雁上山何處尋薜蘿生兒
胡中作胡語教兒長大須記取呼韓受漢恩最深慎莫彎
弓伺月午早被蛾眉累此身欲占馬角誰為主何意黃金
贖阿瞞棄兒從此隔天山荆棘那能問故里焉蘿聊復託

新歡自拚薄命千回折始信人生一死難亂世多才真不

偶流落摧殘常八九王粲登樓祇自傷禰衡觸網將誰咎

可憐漂泊到閨中阿父賜書空在口由來漆室歎葵傷恤

緯何人燕處堂生向烏孫弔公主死留青塚恨王嬙已把

琵琶助哀怨胡笳况復吹伊涼離鸞別鵠滿天地劉商胡笳曲序

曰文姬善琴能為一曲將雛應斷腸

送孫平叔爾準太守之任福建

才名十載動公卿銅虎威儀憶漢京報國文章充廣內傳

家節鉞在邊城承明惜未留嚴助宣室知當召賈生

聖代况今崇吏治觚稜回首漫含情

蓬壺留印雪鴻飛仙客還鄉稱錦衣上冢輪輿銷旅夢渡
江梅柳逐春歸冰融蠡瀆指明鏡烟繞龍山溼翠微多少
人間霖雨事未容輕易拂魚磯

寥帷風俗問無諸攬轡山川入壯圖見說張嬰猶有壘

時泉

州府有以築寨拒捕上控者

早逢廉范豈無襦雲開晝見臨厓石潮滿

宵還合浦珠飽啖荔枝三百顆不須料理橘洲奴

如雲冠蓋自駢闐臭味苔岑託宿緣末契獨酣公瑾酒同
盟羣讓祖生鞭晨星我輩思他日零雨君家感曩篇咫尺
浮槎通碧漢循聲早晚遣書傳

何仙槎

凌漢

編修臘月望雪次東坡臘日游孤山詩

韻率和一首

幾兩屐一曲湖人生此願能償無淳于漫誇稷下辨孔賓
已聽牕前呼杜陵坐歎隨妻孥聊以文字相嬉娛吟詩只
似候蟲叫作書慣學秋蛇紆何郎昨直承明廬徘徊清景
不可孤劇望飛囊潤麩麥那恤急霰凋菰蒲與酣落筆排
千夫朝飢不覺時將哺胸中一字不堪煮始知痛飲真良
圖殘膏丐我如有餘瑕邱之樂應共遽門前歲莫無催逋
黃庭爲我閒臨摹

時以素紙索君書小冊

夜坐有感復次前韻寄仙槎

田變海城爲湖白衣蒼狗何事無北叟獨能識倚伏東隣

且任喧歌呼盤中割肉歸遺孥空囊無粟猶自娛硯北田
荒偶亦熟終南徑捷時還紆蚓壤有食蝸有盧屹足自衆
夔自孤與俗推移亦大好獨難屈曲如葦蒲有時著論名
潛夫據梧兀兀忘夕晡何人急裝正作健坐談毋乃羞壯
圖畿南數縣兵燹餘采樵幾及城東遽曷不執戟追亡逋
須眉要使陵烟摹

送李元方刺史之任霑益州

萬里青蛉道君今擁傳過亂山圍夔夔春水下牂柯邛竹
原通蜀諸生舊姓何如逢洞簫客樂職諧聲歌
意外聯親串殘年惜解攜滇花應早放燕柳尚無稊古峒

人騎象叢祠歲卜雞相思何處寄明月石梁西

仙槎招飲厲齋仍次前韻

我家三江君五湖烟波佳處天下無竭來燕市困塵土牛
從馬走隨人呼太倉日糴愁妻孥不及腐史攜清娛飢腸
一飽輒思逞快吐胸膈消鬱紆城西僻處君所廬祭竈請
隣德不孤相呼賭酒浮大白豈羨百萬投檣蒲我逢杯杓
成懦夫亦能堅坐逾斜晡平生志願苦蕭瑟只今温飽爲
先圖醉歸殘燭留寸餘北風吹破簾編遽未妨急遞催詩
逋壺盧依樣還堪摹

除夕前三日招同人集飲寄藤軒四次前韻

汎郭澥浮江湖雙鳧乘鴈有若無魚游同隊慣相逐鹿鳴
得食聊相呼良朋絕勝妻與孥坐令愁寂成歡娛清冰更
借玉壺映直弦尚覺朱絲紆滄海一粟容吾廬更長燭明
不可孤少陵句論文把酒且爲樂飮盤况有筍及蒲華堂鼎
食羅千夫哀絲豪竹連夕晡何如素心聚三五百錢一醉
皆可圖鳶鷗不用嚇腐餘玉堂天上原蘧蘧今夕何夕慎
勿逋山公倒載人思摹

問張阮林疾不遇

神馬尻輪孰是非祇餐風露詎能肥耽書已中膏肓疾閉
戶還藏怡甃機春日情懷偏淡漠故人咫尺有睽違年來

我亦幽憂甚擬買焦桐學手揮

題吳柳門

文炳

孝廉同年詩集

倚桂仙人慣不眠騎驢重踏薊門烟揮毫對客仍干首歧
路憐君已十年襟上漬痕春酒釀篋中銅暈土花鮮君所蓄古
錢甚夥弓衣蠻繡知他日珍重牛腰束筍編

壯歲幽懷感百端豈徒零落憶詩壇欲拋心力從餘事難
向風塵覓古歡明月半庭和水靜花枝低戶避春寒何當
共作南皮會商略才人到建安

爲董小檀同年題秋燈對讀書圖

君家兄弟皆能文空山讀書聲切雲一燈如豆久相對打

窗落葉秋紛紛青桐花開歲幾度長離雙翔拂雲路三年
藜閣分夜光一夕令原悴朝露與君兄弟情最親相看並
立長松身黃壚痛飲只君共回頭十載長安塵君弟柳江
歿十年矣
披圖示我淚沾臆往日對床曾歎息風雨合散不可知此
樂他年恐難得眼中山色尚依然夢裏池塘那堪憶人生
哀樂誰能裁吾兄七十尤摧頽小小相從讀書處短檠墻
角埋秋苔頭白何時歸去來

讀洪孟慈

節孫

孝廉詩集因憶其尊人北江先生

仙客騎鯨竟不回鳳毛還屬出羣才期君豈止傳家集愧

我會攀注雅臺

先生每日曾以拙
著爾雅古義就質

萬里江山尋舊跡一囊

烟月貯新栽東風又遞看花信遲爾金鰲頂上來

白丁香花

淨洗鉛華著素粧小園猶足冠羣芳千苞婀娜春無力一
樹瓊瓏夜有光淡到梨雲同入夢碎如柳絮却飛香餘陰
亦合裁章乞莫只關心護海棠
藐姑仙子出塵姿翠羽明璫故故垂小玉爲釵攢髻香
塵如屑步輕肌愁心悄對芭蕉捲春色微通豈蕊枝遮莫
中庭涼似水滿身清露立多時

杏花

曲江回首隔前塵淡粉輕烟望未真沙路嫩寒沾酒店畫

欄微雨倚樓人不妨梅子餘酸味

陸佃云梅至北方多變成杏已讓桃

花占早春

京師桃花開時比杏花較早

誰似多情虞閣老紅雲長映白

頭新

求是堂詩集卷十四

銷寒集

涇縣 胡承珙 墨莊

宣德醮壇銅盞歌為董琴南

國華編修賦

非盃非斝形橢圓土花赤駁聲鏗然董侯云是醮壇盞底
窪深刻宣德年聖孫英武類成祖每笑秦漢求神仙長生
服食不足道豈必旦夕祠甘泉却觀盞質致完好輪郭耳
足無刃鐫得非寶藏被焚後五金一冶重鎔煎特頒內樣
製諸器一十二火光騰躔因思承平富物力尚方工作皆
精堅雞缸象鬲重欵識 吳梅村以雞缸為宣窑又宣
鑪有象鬲式見柳南隨筆至今
好事猶稱宣當時勵精在朝宁三楊寒夏相比肩作事都

能計長久非徒粉飾偷目前逡巡季世成隋窳濫惡乃及
青銅錢崇禎間京師九門皆設杵曰收毀私錢一物已足觀世變摩抄銅狄
何殊焉即今想像舊藏處廣寒清暑深淵蛭流傳幾度落
人世坐與歲月同推遷可憐冶鑄好工手北施南蔡知誰
先蕭齋得此亦清供且與煮茗焚龍涎

謝向亭

階樹

編修出示所著宜黃竹枝詞即題其後

翰林百廿首新詩拉雜鄉音絕妙詞越客休誇聖湖景宜
山何處不相宜

豫章一記擅清新博物羣推雷什倫兩地雞籠山色好著
書還是聽雞人宋雷次宗嘗開館於建業雞籠山下君家居讀書處亦名雞籠山故有中宵原有聽

雞人句

誰道臨川逸永嘉祇應屐齒欠梳爬千秋重補游山志畢

竟風流屬謝家

宜黃宋屬臨川郡謝靈運為臨川內史史言其在郡游放不異永嘉而臨川詩見集

中者甚少

落日寒雲欲暮天無端鄉思鎮相牽清冷江上聞歌後不

見昭亭又七年

漢志宛陵下有清水說文以為冷水即吾鄉清弋江也予舊有清弋江權歌敬亭山

一名昭亭山

元祐黨籍碑

崇寧

一網盡清流猶賴寒巖片石留消長從來關數世姓

名到此計千秋隙開洛蜀成龍戰禍始熙豐失燕謀宵小

有才真不幸可憐孤負字銀鉤

黨魁涑水與眉山附麗何緣幸不刪執藝有人知直道貢

金無鼎鑄神姦竟干垂象天甯醉得共流芳石豈頑太息

慶元仍覆轍滄洲樵叟涕同潛

永樂大典有慶元黨禁一卷題曰滄洲樵叟撰

寶晉齋第二硯歌為朱蘭坡侍講賦 并引

硯長六寸許廣半之五分其廣以為厚面有池近

池刻兩已相背形其背有行書寶晉齋第二硯六

字左側有小字二行云此米氏亞硯亞即其名也

亦謂之欵硯後人仿之為黼黻硯此石得之師林

池中寶物不終晦信然下署伯仁二字蓋文伯仁

字德承號五峯者明待詔徵仲先生從子也硯藏

蘭坡令兄靜齋侍郎所

寶晉齋中足奇器洞天一品工位置與人作硯石不辭

獨胡為署第二老顛好事勤搜羅青州紅絲蓄必多太陽

坑石有何好乃取質堅理密宜研磨不知筆墨怕屠膾 見張

邦基墨以此品題甲乙甯無訛卻鑄一字其名亞名從主

人定珍物可堪璞王知者希第二已上多淪沒 語出晉書陸喜傳

塵埋苔蝕經幾年玉蝓別淚流涓涓中間豈入清闕閣不

爾何以師林池上騰紫烟文家羣從後來秀獲此猶結書

畫緣寫經繪佛踐妖夢 見快雪堂漫錄想應與爾常周旋吾儕夙

世謬詞客但解相從鬪詩格揭來呵硯墨瀋流水冷天寒
不須炙君家大陸什襲珍研山不啻逢嶙峋今夕傳觀獨
坦率不畏著唾遭嫌嗔始知當時刻畫有深意欲免趙璧
睨強秦君不見李揆恐被單于識諱說中朝第一人

冷謙蓬萊仙奕圖

神山蒼蒼隱烟霧瓊樓絳闕莽無數海水如聞汨沒聲楸
枰却指虛無路安期羨門知在亡秦漢之君竟不悟仙人
局上劫更急羸顛劉蹶那暇顧通神畢竟有高下護短能
無恣喜怒昌黎詩乃知仙人未賢
聖護短憑愚邀我敬祇應借此破無聊歲月
長閒苦難度風雨不知左股失星辰空向盤中駐可憐賺

得爛柯人骨肉成塵一朝暮奉常自是仙者流黃金可作
世可度即如妙畫亦通靈何事教人入藏庫酒甕一躍無
還時莫是潛來畫中住即今蔓草碧雞坊好手如君不可
遇卷圖一笑且銜杯人生肯爲神仙誤

安化茶和陶雲汀澗前輩四首

歲朝才幾日醉飽令人息平生藜苲腸那慣牛羊躑亦有
書傳香羶腥肯教晚此時欲茗心渴虹赴滄海長安酒肉
地湯社幾人在祇應呼吾儕相與澆壘塊君家擅茗事紅
囊費揀采睡足時一甌氤氳契真宰怪底新詩成隨風落
珠咳

君詩如茶烟無心吐層疊上言風土佳提筐徧臣妾下言

功用溥賦篋尉候接西北互市賦茶以篋計庶幾勞者歌猶入貴人

取兼思操利權坐令諸部惴民生與國計瞭視如在睫苦

口請試嘗冷面不容燭豈屑著茶經但品槍與葉

資江吾未到波紋想激灩幾朶浮青山山名見九域志倒影色如

染春風草木香詎獨蒞蘭占芽抽雷後驚旗展雨前霰吾

家近了山陽坡時在念誰云酪漿奴鄉味素屬饜燕市佳

者希千錢不盈襜遂令消渴疾濡沫費喁噉况懷鮓鮓嗜

舌乾不能醮二者去孰先熊魚或難兼甯斷長相思不辭

七盞子性嗜葉子烟故借用鮓鼠食烟事未數語見茶餘客話所載韓慕廬宗伯事姚旅露書云葉子烟

又名相思草

昇平盛故事首宴開

重華雲龍小蒼壁分似古所呀官羊夢不識官焙望敢奢

惟當同岑者憐我斛二痕滿眼瀟湘春破睡思拜嘉舌在

倘知味詩情安足誇

為錢衍石儀吉農部同年題其五世祖鶴菴先生畫

松

空山何時龍骨蛻一節專車覺車隘忽來堂上雲霧生見

是髯公百年畫石間屈鐵根鬱盤餘勢森然出紙外閉戶

著書君勿駭恐有琥珀夜深走光怪

爲吳蘭雪高梁舍人題文信國寄其先世架閣君手

札翁覃溪閣
學樵本

白雁南飛天水碧文山獨捧勤王檄灑涕登舟贛石前幕
府從來盛賓客永豐舊尉新溪吳奮袂參軍蝟髯礫銳師
却遣屯洪都枋國何人袒萬石事見劉岳申所撰文信國
傳較宋史爲詳札中有師

次於洪語正留夢炎當國令黃萬
石入衛以信國移屯隆興時也

三札殷勤正此時想見

運籌資擘畫儲胥常遣護風雲號令猶看走霹靂是時半
壁無東南除却舟中皆敵國梅州再出尤搶攘空坑一蹶
斷消息鯨波虎口劇間關知費賓僚幾心力鄒鳳叔劉小
村鞏信蕭明會鳳李梓彭震羅開陳繼
哲發龍禮周中齋附傳逾四十

如公名字猶沈淪天教湛輩不終沒幸留此札遺仍雲流
傳亦被六丁取蘭亭摹本猶有神舍人述德出相示令我
低徊念青史時平宰相貴求才勢急朝廷賴養士守官詎
復論崇卑合志何曾問生死當年此札三摩抄肯使平生
負知己君不見荒魂月黑歸西臺古血花紅照燕市

題蘭雪廬山紀游詩後

君家西江水我家南江流三天子都各占一山經水經費
冥搜千巖萬壑遙相望雲滅雲生各殊狀吳楚一氣迴蒼
茫競蠹青冥肯相讓我從丹竈尋軒皇忽然飛度三石梁
雲頭閣向最高頂仙夢一墮成渺茫君居鄉里不稱意抖

撒衣塵著山翠四海才名近卅年才爲山靈費清思君游
我游兩不知但見薜壁剝落多題詩前瞻萬萬古後來定
爲誰賞心寓目不相喻陳迹倏與浮雲馳吾儕雕刻苦肝
腎却恐尚被山靈欺別來幾載心猶戀翠壁丹崖付虛願
安得青松爲筆石爲硯倒曳飛泉作長練與君同坐千峯
頭唵盡朝昏百千變君應輸我游興豪裏糧千里尋江臯
是時三十健腰脚超忽木杪先猿猱我却輸君得名早脫
口新詩付梨棗且喜荀公日下逢甯容庾信江關老篋中
有句今十年蠹魚飽食猶成仙與君尚復落塵海抱此區
區殊可憐君不見不廢江流日東注各有名山盍歸去

題蘭雪游武夷詩後即效其體

仙山樓閣常冥冥詩人搖筆天光青非絲非竹滿清聽仙
樂紙上聲泠泠天柱峯頭吾未到他年或有霓旌召清溪
九曲迴松風料理金箱鹿盧屨定把君詩作鄉導

雲汀前輩許惠安化茶不至用杜工部集王十七侍

御許攜酒過草堂詩韻奉簡

繡衣家醞何須倒蠟紙官封那得開正擬破除春晝倦可
容分遣好風來輞饑未免思新韭消渴能無望熟梅留取
奩中青橄欖要令諫味一時回

琴南編修招作銷寒第一集蘭坡侍講以疾不赴仍

寄一詩次韻答之

十年虛溷輓塵中童鵠頻看化老翁肯便心情歸貝葉是日

座中出菩提葉聊因文字飲郵筒幾人尚卧漳濱日蘭坡

傳觀即以命題皆以疾不與會劉芙初編修時亦病足此會猶餘鄴下風留待牽連書姓字衍石

不須當世有揚雄

菩提葉

一片秋蟬翼飛來訶子林即看虛淨相如見妙明心海雨
染空色天風搖碎音了知無樹意多事費清吟

擬李長吉北中寒

燕草霜濃碧絲斷白沙碎碎枯蓬轉天風衝動碣石根瀚

海塵飛日輪短金爐獸燄埋冷灰吹殘鄒律暖不回易水
凝澌浪聲小春光何處黃金臺

擬温飛卿塞寒行

塞山百丈騰蛇尾凍合胭脂不成紫層冰夜裂聲如雷飲
馬長城窟中水年年捲帳隨康居漢旗露溼晴不舒一陣
橫斜雁沒處雲黃沙白天有無都護都護玉關道三十六
國滿秋草龍雀刀頭幾個環坐使霜華鏡中老

寄懷雲汀漕使揚州

聞道青天轉粟難繡衣晨夕犯霜寒從教
國計饒紅腐倍使吾儕愧素餐十里珠簾希復見一江春

水獨相干信知財力東南倚長久還須策治安

酒伴當筵話合離邀題人日草堂詩租船明月誰高詠官

閣梅花正好時釀雪光陰虛久望時京師一冬無雪煮茶風味費

相思天涯剩有朋尊樂青渚歸艤莫遣遲

為陳石士用光前輩題高山流水硯云是姚姬傳先

生所贈物

良工斲材山水窟元雲沈沈光滑笏扣之斑管含清音宛

似枯桐響飄忽怪君無端什襲藏重是惜抱軒中物惜抱

老人君本師輟贈當年手頻拂堅貞交道耐長久縝密文

章露風骨只今魯殿傾靈光此石應成口中闕平生我亦

感知已膏馥陶泓正思乞秋風千里秣陵書坐使音徽間

存沒去秋君見示姬傳先生所寄書中道及賤名有真讀書人之目予有媿其言方致書請益而先生已歸道

山為君摩抄三歎息耆舊風流盡彫歇近日程君疇徵士段茂堂大令皆相

繼下但令對此重移情獨不見山林杳冥水汨沒

陳章侯畫鷹

誰能畫鷹如畫馬顧視清高意閑雅青天萬里明纖豪一

擊翩然肯輕下酒酣落拓陳章侯濡筆淋漓淚潛寫叢山

絕粒漳浦死勁氣森森見應寡當時贗本多流傳且將掛

壁驚烏鳶真骨亦復愁拘攣杜陵冷客漫相笑未易搏空

上九天

送黃霽青

安濤

編修典試貴州

滿眼浮雲送客時此行天似爲昌詩開通五尺途非舊歷
盡千山氣始奇鏤管采風苗女曲篝燈聽雨竹郎祠三年
例折青門柳獨有光華照路歧

待把夫容上玉京漫緣幽思緩王程黔巖草木秋無影楚
澤魚龍夜有聲近局暫停河朔飲君方約爲道暑之會以行不果清時休
問水西兵文章自是吾徒事料理平生報

國情

題白將軍戎裝畫像

并引

將軍白姓名雲上字秋齋河內人以武進士任平

望都司受知陳榕門相國游升金山營叅將在揚
州救火振饑皆有功士民德之嘉慶十三年入祀
名宦祠

高冠長劔纓曼胡英姿颯爽森麋須却觀氣韻文而儒白
將軍者真丈夫當年殺賊長蕩湖扁舟夜夜懸頭顱動如
快鷁靜如女裋中所寶榕門書陽春有腳安能駐片帆又
向邗溝渡萬福威名草木知張遼姓氏兒童怖誰能戢火
如戢兵將軍見火身益輕入火奪火所炊屋祝融吳回不
敢爭誰能救饑如救焚將軍旱澇籌米薪急裝羞殺坐談
客始知大勇由于仁時平坐長英雄髀生不封侯身老矣

獨有心肝奉

至尊贏得循聲入青史人生端合死揚州禪智山光照禪
祀披圖令我增歎吁淮南淮北今何如歌哭猶聞竹西路
勲名何必陵烟樵誠知草竊尋常有祇惜花卿絕世無

琅琊臺秦二世石刻

秦人遇民若芟草海上之石猶可危神鞭所驅血流赤餘
者盡用鐫諛辭墜星裂地祖龍死當璧可笑貽纖兒東行
於海擁萬騎詔書重刻誇餘威成功盛德乃如此神歇靈
繹海水飛羣臣從官昧死請珥筆定出丞相斯君驂已夢
白虎齧臣手難牽黃犬馳那及頑姿耐長久怪雨洗剥盲

風吹薜荔鉤衣鬼母哭海枯幾見三山欵年深已足驕員

鼻地僻幸未遭佛狸

嶧山秦碑為魏太武所仆見封演聞見記

校官擴本使者

訪

阮芸臺先生督學山東始訪得此刻

八十六字存幾希矯誣之辭天所棄

豈有神物相護持或者小篆入神妙精靈盤攫成蛟螭神

洲

在琅琊臺畔

光恠奪秦月夜夜照映荒山陞書生胸中過秦

論對此頓欲傾權奇安得越臺懷古一長嘯快覩海天搖

蕩青玻璃

琴南編修席上賦九寒詩各一首

穹廬如蓋莫天橫淡墨濃烟畫不成大漠四圍涵雪影長
空一片走風聲烘殘夕照光難透歛盡奇峰意已平莫道

無心虛出岫護霜知閱幾陰晴

寒雲

木落天高夜氣森冰輪孤湧衆星沉盧龍塞外千堆雪丹
鳳城中萬戶砧大地山河經凍合南飛鳥誰抱枝瘖瓊樓
玉宇空言好誰識姮娥耐冷心

寒月

朔風吹字一行斜聞道寒門舊有家千里星霜新客路十
年雲水冷生涯襪裊影襯蘆中士嗚咽聲摹塞上笳畢竟
衡陽春信準歸飛剛及草初芽

寒雁

幾隊渾如趁馬蹏城東朝見暮城西平蕪點黑濃霜滿側
翅微明夕照低燕草場空何處啄秦樓燈暗盡情啼五陵
年少饒金彈揀徧寒枝莫漫棲

寒鴉

綠陰繫馬記吾曾對此婆娑百感增飛絮前身原似雪攀
條舊淚又成冰烟荒驛路知誰過月靜粧樓怯更憑最是
懷人搖落後離情寒思兩難勝

寒柳

蕭瑟園林一望中修篁獨自倚牆東叢深密霰喧饑雀葉
老殘符蛻蠹蟲翠裊有人憐薄莫青鸞無信寄長空遙知
松菊荒三徑歲晚前盟孰與同

寒竹

何處豐山九乳懸鯨魚長吼夜如年雪埋鑊徑僧歸寺月
落楓林客在船隱隱空江度烟水迢迢哀角和霜天尋常
喚醒重衾夢深省由來不是禪

寒鐘

暝色增寒望欲迷劇憐幽火露參差霜清茅屋鳴機處月

黑蘆灣喚渡時耿壁花稀閨夢杳籠竿風急客心危蕭齋
別有殘檠在俛影長親祇自知

寒燈

倚杖羣山盡處村蒼然暮色近黃昏天邊著雪明礬意塞
上連雲隱燒痕繪得巖姿應似睡生來石骨不宜溫幽人
定向何峯住獨抱冬心靜閉門

寒山

丙子十二月十九日同人集梁蒞鄰

章鉅

禮部厲齋

爲東坡先生生辰設祀

酌公黃甘碧香之美酒羞公玉版玉糝之肴羹忽然咳唾
九天上雲車風馬俱有聲下爲江沱會潛漢上爲井絡聯
天彭文章節義兩不朽早脫死籍登長生君不見公生再

值歲丙子景祐紹聖一彈指宰相之才應運生胡爲擠之
瀕于死可真磨蝎巧躔身空有伏犀長貫耳沈廣南謝道
士行年之同偶然爾流俗棲遲亦如此計公生日經幾回
黃州赤嶼差可喜作詩有王郎吹篴有李委高歌鸛鶴驚
危巢醜酒魚龍出寒水只今艤楫臨臯亭猶覺江山擅清
美祝公拜公何時無難得逢公覽揆始元氣長留天地間
七百八十一年矣春風隨公來畫堂

是日立春

滿堂搖動蠟燭

光送公騎龍歸帝鄉公乎曷不稍迴翔吾儕買田築室各
有願相約歲歲爲公傾一觴

爲雲汀前輩題漕河禱冰圖

銜尾千艘自北來長河一夕報冰開灌壇恍覺神靈助宜
室從知使者才甓社珠光爭夜月叢祠簫鼓起冬雷遙看
青渚歸艍候猶有樵風送客回

見說河干板築齊重新丹雘飾連閨隋堤想見排青鶴漢
室何煩祀碧雞古木寒雲宜入畫明璫翠羽記留題他年
繫纜經祠宇還覩

天文煥斗奎

時百菊溪制府以露筋祠神助順利漕奏請修葺廟宇詔賜額以昭靈異

文信國琴歌

琴有信國題句云松風一榻雨蕭蕭萬里封疆不
寂寥獨坐瑤琴遺世慮君恩猶恐壯懷消末題景

炎元年蒙恩召入夜宿青原寺有感譜于琴中識
之此琴今藏閩人李氏梁禮部菑鄰以搨本見示
為賦長句

毀家散盡堂前伎獨抱青琴誓生死剩水殘山託七絃攫
醜聲聲皆變徵臯亭被脅京口逃海水汨沒山林號拘幽
操兮走馬引琴乎會否同斯遭間關萬死脫虎口景炎何
幸趨行朝青原合近中川寺會讀中興碑第二

公至温州詩云乘潮

一到中川寺暗讀中興第二碑

風雨高歌泣鬼神江海飄零感忠義一片

新亭灑淚痕斷紋猶識君恩字從此冰絃春不溫稜稜正
氣如可捫燕市真成廣陵散楚些難返西臺魂羅道士汪

水雲枯桐疇昔知音存歷劫尚未遭摧焚罷琴惆悵月照

席用公胡笳十八拍中集杜句數拍胡笳誰忍聞

岱頂秦碑殘字拓本

焚書遺燼累名山猶見殘碑出世間

碑久燬于火近始得斷石數片于玉女池

存臣斯

七十家文

甯有此二千年石是真頑

集古錄云江鄰幾嘗至泰

山頂視秦所刻石處云石頑不可鑄鑿不知當時何以刻也

封多祕牒誰能掘神為証

辭倘盡刪莫笑劉郎少才思升中無字却空還

為霽青編修題所藏紀文達公九十九研銘拓本

青鐵自緣旌博物玉堂原合取端材就中若箇隨臣向勘

徧羣書七畧來

癡人詎獨桓司馬滿百猶思甃壙甄省識閱微文達公微草堂名

意在草堂隅缺不求全

眾春園畔舊精廬宋宅還教庾信居

君前廡文達公虎坊橋舊宅其西即毛西

河集所稱也過眼雲烟零落盡也應清淚滴蟾蜍

銘本如看說硯篇瀛洲同作舊聞傳

朱竹垞有說硯一首又會廡虎坊橋輯瀛

洲道古錄憑誰為補先生影猶似屏風寫樂天

李北海麓山寺碑為雲汀前輩題

我昔游匡廬東林適未至傳聞北海碑久已毀初地當年

遵化謫江湘屢停轡躡衣元徽塔濡翰太始寺麓山玉泉

南穹跌壓鬣肩窈糾龍蛇文湖光映明媚浩劫馳浮雲猶

餘蘚斑翠緬懷江夏姿太息開寶事鋒棱振直聲壺殮動
高義才名四十年每為時宰忌燕公固忤人姚相獨何意
卒因惹改讒竟缺干將利生前孔璋書身後杜陵淚直道
世猶存斯人本無累不見碑板存至今有生氣君家麓山
旁舊搨珍在笥為言三絕名君言此碑北海撰文并書及自刻石其所稱黃鶴山樵刻
者即邕託名故世稱為三絕碑比美六公製郭公苦殘闕碑陰為明提學郭登庸磨去一
段大書橫勒其沈郎僅扶置嘉慶六七年間有達官遣吏拓取不以法其碑遂裂有沈
上真妄庸人也太守用灰油膠固後來或咨嗟搜索恐無自何當浮洞庭
之不能復舊觀矣一攬迴雁勢松徑度清涼
檀椎倘親致彼哉宋公題道林
安足記
方輿勝覽道林寺有宋之問詩杜工部岳麓山道林二寺行云宋公放逐曾題壁物色分留與老夫

為李蘭卿舍人題所製縮樵雪浪石盆銘箋

駁石迴割飛狐脊高盆會洗玉女頭當時遊戲已縮本更
誰縮向巾箱收坡仙去後並湮沒延津再合疑千秋眾春
園中安位置埋盆汲井驚鄰州琉璃幸免妙庭碎古銅安
得高麗留丈八芙蓉宛然好終恐夜壑移藏舟九華失去
虛夢想五嶽圖成宜卧游巧樵盃脫託文具幻出鉢咒通
神謀化身頓作百千億衍波恍惚跳珠流紙光如鏡掾如
月五十六字如環周剡藤從此信堪賀姚家獅鳳空雕鏤
三章乞越昔未許尺幅箋天今可求鈞天輟聽啟閭闔黃
柑青韭羅肴饌是日適為東坡先生生辰設祀澄心百金那可得所慮詩

老空囊羞辨香壽公錦繡段青玉案在公應酬紫微故事
繼先哲看君落筆何能休琅玕十幅倘分我坐令肝腎生
閑愁

題雲汀前輩入蜀出蜀圖

前騎俛仰雕尻連捫參厯井危到天後舟迅若矢脫絃郵
鼓未絕計里千誰歟揮灑水陸成雲烟乃是長沙才子入
蜀出蜀往復旋猿聲鳥道厯厯如當年男兒生不將兵宜
出使况有因緣在文字巴山話雨幾新篇益部占星尤故
事時清不用長卿檄地古惟尋道將志君不見梁益天險
殊奇哉卧龍躍馬成劫灰江山如此竟何意造物祇似供

詩材蠶叢魚鳧墜闕不到處定有健筆能爲開草堂無人
謫僊死范陸亦足稱雄才君能鐫鑿出新意安知不奪造
化重胚胎蕭湘一曲君常弄八九胸還貯雲夢更教橫絕
峨眉顛奇氣故應天所縱我亦同時拜

國恩半肩行李出修門探奇自欲入海窟却輸君已窮江
源十年詩筆在懷衷至今空帶蠻烟痕安得荆關逢好手
便令陶謝與同論

梁蒞鄰禮部古瓦硯齋題所藏林吉人甘泉宮瓦拓

本

漢武遺宮蔓草荒誰騎匹馬問斜陽已知片瓦千金值又

見殘編百歲強冊中多國初諸名宿題詠其後數葉著
錄諸家補歐趙飛騰前輩敵班張長生那及陶家土文字
因緣且未央

雲汀給事席上賦白櫻桃二首

朱櫻故事不勝徵滴粉成珠見未曾幾樹月明疑綴露滿
籃風細欲消冰盧生衫裊餘津在樊子肌膚本雪凝待聽
清歌傳樂府長安風味一回增白櫻桃惟京師
西山中有之

歲月消寒道暑中良朋贏得一尊同參將玉板非無色瀉
入晶盤也是空俊味已輸鹽欖苦素心休羨石榴紅南皮
可待成追憶沈李浮瓜且未窮時君將
外任

霽青編修招同城南訪菊歸飲厲齋即席一首

纔罷尋春婪尾杯鳴鞭又爲訪秋來但無塵處皆堪隱未
到霜時不肯開晴日最宜佳節展時重陽
後一日高城休放夕陽
催君家老圃猶餘地合費青錢買本栽

石士前輩惠所製縮摹東坡石鈔箋弁引

鈔爲元水村所藏後有人以重價購去水村乃繪
樣作圖寄翁覃溪閣學君從閣學處撫得之者考
東坡試院煎茶詩已有罇鑪石鈔行相隨句事在
熙寧五年此鈔腹刻元祐二字應是集中周種所
惠者公以元祐元年舉江甯府司理周種充學官

故定此銚種所惠也

紙上胡爲起雲霧鬢絲恍繞茶烟素翰林好事能翻新
得東坡好茶具東坡煎茶出西蜀罇鑪石銚隨行住此獨
深鐫元祐年自應曾得周郎顧一從輟贈索新詩蘚漬雲
蒸憶佳句是時風日清玉堂小團肯遺銅腥汚柘羅罷棄
不復陳至竟流傳落何處水村畫樣蘇絲藏也如折杵欣
遭遇見東坡次韻董夷仲茶磨詩異代翻教墨瀋沾化身合受芸香護
吾儕酒渴競思傾地鑪活火足風趣瓦盆盛酒邀比鄰石
鼎聯吟送歲莫乞取雲藍幾幅分勝如秀碧盈甌注請君
檢點瓶與甕或恐他年作掌故

同人小飲廡齋出吾鄉琴魚筍脯餉客各賦三絕句
丹泉洞口響悄悄千載溪流尚姓琴吹盡紅霞齊出聽微
鱗都似有仙心

湍激流清映帶餘風光偏好莫春初長橋幾折闌干影千
點楊花一寸魚

故人知我病思家千里筠籠餉藥查琴魚一名藥查魚忽憶十年
谿上別春風閒煞釣徒槎

右琴魚

沿溪十里碧琅玕一夜驚雷萬箭攢正是江鄉燕來候蘆
牙菌耳共登盤

欲脫青衫爲汝歸南風吹老竹成團即看鹽腊形枯瘦

食筍詩鹽
晞枯腊瘦猶勝朱門食肉肥

尋常煮簞笑匆匆鄉味無多與客同料得空腸芒角在併
將烟雨貯胷中

右筍脯

題楊文靖宣德二年書功德寶經卷子

金問何人侍太子詞連洗馬罪應死錦衣一繫經十年讀
徧諸經及諸史得非佛力陰護持太平相業先基此洪熙
再見天日光聖孫嗣祚尤彰美三楊政府公較遲功名却
並東西峙退食閒書一卷經八方無事可知矣歸然耆舊

歷四朝先帝念卿言在耳避賢不及金經持怙寵先看鐵
碑毀先機事失誰能追後死身孤復何恃令人三歎憶仁
宣一德君臣若魚水果能聖壽祝無量功德人天大歡喜
更書貝葉日千番何慮宮中出片紙

壽青編修招同人集厲齋爲東坡先生作生日賦得

赤壁置酒李委吹笛故事

小年愛讀赤壁賦會到坡公昔游處

子以壬戌臘月過
赤壁流連竟日江

山風月故依然七百餘年猶旦莫神仙小謫齊安城臨臯
亭下三清明生辰置酒盛賓客定有洞簫道士琴崔成何
來紫裘生撼遂飛新聲想見掀髯一笑玉山倒頓使老鵠

格磔潛虬驚吾儕相釀爲公壽三度醉公眞一酒更無新
曲獻當筵縱有小詩羞出手何時雲夢澤南州擊汰明光
尋舊遊銅琶鐵板試高唱一洗胸中萬古愁

雲汀前輩惠高麗狼豪筆 并引

黃山谷猩猩毛筆詩自注云錢穆父奉使高麗得
猩猩毛筆甚珍之云云任淵注引王雲雞林志高
麗筆蘆管黃毫健而易乏舊云猩猩毛或言是物
四足長尾善緣木蓋狄毛或鼠鬚之類案此所言
筆狀與今高麗狼毫筆正同爾雅鼬鼠郭云今鼬
似貂赤黃色大尾啖鼠江東呼爲鼬案鼬莊子作

狂與曲禮狂狂同字故山谷即以能言之獸當之
其實非也今名狼豪者則以鼬善啖鼠俗有鼠狼
之名耳

先生使筆如使刀著書掃盡千兔豪更從海外得奇具乃
是穆父猩猩毛鼠狼非狼亦豐翰管城之封賀爾遭况從
虎僕備東觀豈讓貉角誇西遼先生得此供題詠脫帽蒙
茸却圓勁貂珥簪來映髻華豸冠執處知心正三錢坡老

漫矜持十玩雲卿記投贈

高麗鄭士龍字雲卿嘗築堂名曰十玩堂筆其一也見靜志居

詩挽弧我輩羞壯夫閉門輦下箋蟲魚得分餘潤到蘆管

底須觸熱搖松膚更乞明光白唾紙

高麗人以松膚柔者緝成扇又其紙名白

雞林志 爲君聊試草元書

爲霽青編修題憶梅圖

天風吹空海水凍玉堂鈴索無人控雲窗雪案非世間閉
門有客時尋夢夢中驀地春風來千樹萬樹梅花開想得
江南此時節暗香踈影相裊裊君言十載去鄉國欲問南
枝絕消息當時踏雪騎蹇驢小橋流水尋常值忽到牕前
疑故人屋梁落月空顏色聊將短幅狀蕭疏一種相思豈
傳得人生修不到梅花况欲花時常在家我有敝廬置人
外數株老幹蟠龍蛇却恐花枝轉相憶惜無妙手圖橫斜
便欲從君吹玉笛且教愁思散天涯

求是堂詩集卷十五

賞春集

涇縣 胡承珙 墨莊

立春後一日雪

清曉市聲寂昨宵幽夢飛已看回潤色轉覺減寒威霽景
有時露春風何處歸拳簾對馴雀意得亦忘機
憶昨鄉書至初冬雪已賒生涯占麥隴歸思問梅花塵土
清雙轂炊烟溼萬家呼兒頻掃徑吾自煮吾茶

除夕又雪

依然雲匝匝復此雪連翩舊積如逢伴新晴待判年閒門
希酒債薄祭有詩篇縱使屠蘇後銜杯亦快然

不成披氅出惟愛擁爐看淡入春痕化平延暝色寬紅燈
茲夕好白屋幾家寒却聽兒童詫庭前玉作團

次韻魯服齋立春日感懷遣興各一首

土牛遲步腹空餍竹馬回頭境已過心逐曉雲飛易倦事
如春夢醒偏訛將勤未必能償拙知足何須善用多却笑
相逢話歸思年時爲底並蹉跎

君與予皆欲乞假
暫歸既而不果

當官曾未獻輿箴懷土空思效烏隄任使和風吹滿袖難
銷涼雪壓斜簪桃符似我年年退柏酒看人細細割剩許
游春供買醉近來諛墓不多金

次韻陳碩士前輩元旦試筆自題所作雜文即效其

體

十年宦似窮塞主一室坐作菴闍黎已覺條風活硯水更
憐殘雪明書帷寄興偶讀有聲畫觸愁始羨無字碑敬禮
小文須早定子雲後世誰能期

贈吳孝廉

寶潤

燕山風雪幾經寒擊筑悲歌行路難著手縱能驅鬼遁

君善

醫

將心猶欲遣人安全家贈我茱萸佩隔巷邀君首藉盤

莫便扁舟逐鰕菜曲江花好且須看

時君將謁
選得司教

碩士前輩招游法源寺看花以事不果往明日以二
詩見示次韻奉酬且訂後約

敝裘春來質幾領尋春宜醉不宜醒孟公不顧尚書期多
事列侯奉朝請故山酒熟烹黃雞故人催歸曾有詩眼前
此約不能赴何況千里山中期池魚籠鳥竟誰可周旋久
矣願爲我安能摧眉復折腰路旁趨避火城火
四更顛倒求衣冠觚棱棲爵漏未殘屬車已扈豹尾後蠹
筆猶望螭頭班是日駕由宮幸圓明園故散歸來遲日
滿蓬戶出門無向但默處囑花稍待終須游憑仗東風爲
扶樹君詩妙入秋豪顛筆墨以外猶餘妍卜鄰他日不須
問大作家原在那邊

九十九研圖爲顧梧齋題

此生能著幾兩屐安用胡椒八百石名流嗜好皆足傳但
須不涉和嶠癖顧君好硯如好色靡顏膩理摩抄劇眼光
入石無匿疵呵筆成雲有餘澤南游海國經幾年不把珍
珠問番舶下巖水坑今已稀天獨於君不稍惜塵埋璞玉
人未知往往屢頭數錢易歸舟載得九十九逞志何難便
盈百妙用原從虛一藏知足還留大千隙墨欲磨人空復
堅硯堪計世何須益不見君家文學名八分能使杜陵請
題壁圖中金粟影飄然他日東吳重真蹟人生夔虵湯相
憐我僅牕前一泓碧

雨後崇效寺看牡丹

寺僧言種花法甚詳且
出示紅杏青松圖卷子

輕寒料理過殘春綠意郊原取次勻雨細著枝纔似露花
開如面不宜塵佛香襲袖皆真味初地培根是淨因我亦
小園勤抱甕等閒輸與箇中人

逡巡屢誤看花期酒伴無多各絆羈且喜我來亭午候不

妨人認殿春姿

時同侶有誤疑爲芍藥者

簷間芳樹頻看禿

寺中舊有海棠一株

極盛今其頂髡矣

砌畔陳根那可移剩有長留詩卷在闍梁休恠

老僧癡

次韻蘭坡邑邸看花辭

軟紅十丈殢東華斗酒年豐未易賒睡足春風三十日雙
眸如水合看花

剪綠裁紅一色齊海棠舒萼柳舒蕙入門徑造花深處不
管藤梢礙帽低

買宅閒坊署券新綠楊猶是一家春

邸爲吾邑人新置予寓即在其旁

年

來事事浮雲變只有名花似故人

半世清狂興不禁每逢花處尚孤斟小園况是藏春塢未
用荒郊策蹇尋

過客牆頭詫見稀幕天席地擁芳菲便令醉倒香泥浣終
勝緇塵染素衣

屏風九錫湯相加但著輕旛弄影斜一月閉門觀不足有
人走馬說看花

新來種樹愛吾廬
兒解編籬僕荷鋤
似此園林功幾許
也應回憶十年初

尊前贏得自由身
花底無人妬要津
細數蹉跎十年事
不會辜負客中春

放手杯空莫候催
會看秋井塌蒼苔
飛花一夜瀟瀟雨
明日多應悔未來

酒邊盟約待重溫
袖裏詩篇且細論
萬事回頭如轉燭
春風吹過便無痕

即事有贈

曲中只合唱檀來
一笑芳蘭竟體開
贏得姓名香滿口
不

知誰是噉香才

輕雷隱隱走鈿車
曉日芙蓉識面初
那道城東狹斜路
有人搔首夜躊躇

百罰深杯不厭多
酒潮添暈上微渦
當筵魂已禁銷得
更聽如環一曲歌

都被清愁一段牽
判花訟酒度年年
君看四月長安市
芍藥櫻桃並可憐

代朱鞠泮有贈

真成移坐看王郎
欲託微波已斷腸
嫵媚自憐飛鳥意
不須花外度鶯吭

識字聰明到口知不矜顧影弄妍姿恠他靜似金閨質猶
記書聲上學時

釣魚臺即事

修眉天際畫西山倒影輕螺浸一灣斜倚微風橋上立衣
香人影水中間

滿地濃陰散馬蹄碧絲燕草護長堤扶將一樹臨風玉楊
柳千條首盡低

鬥雞臺畔是儂家后土祠前第一花多愧二分明月影照
人無賴客天涯

恨不攜竿枉羨魚桃花落後客來疏憑誰留得花顏色記

取紅潮上頰初

年少三河未染塵酒邊宜笑復宜嗔臨流不辦忘歸去無
奈橫波飭却人

陶然亭送朱仁齋太守之官嘉定府

平羌江水如碧玉大峩小峩鏡中綠半輪山月疑有情飛
來却照離筵明離筵忽憶卽筒酒一麾難得陵雲守陵雲
百尺高嵯峨使君但飲清江波海棠開日紅雲繞絃管香
風滿城曉直須爲此醉百回免令笑倒彭淵才况今樂土
稱益二知君卧閣有餘思豈獨岑參能好奇始識巴川足
勝事風光澹沲城南亭蒲茸含紫蘆芽青折柳頻年送舊

雨落花一輩如晨星時同里諸君南宮報罷多歸者太行遮目知幾陘亭
前他日愁重經西風落木望君處思殺江猿吟翠屏

翥雲孝廉榜後移寓敝齋

落花隨地豈能齊芳草連天最易迷二頃未成游子計一
枝多傍故人棲住經夜雨醒槐夢歸待秋風墮燕泥判得
醉眠過百日玉瓶絲絡爲君提

竹村孝廉榜後暫寓敝齋授兒輩經用前韻贈之

得失何勞問楚齊本來蕉鹿未曾迷陳編肯付枯蟬守低
樹聊因短羽棲密蔭簾櫳涼似水長閒門巷淨無泥漚急
風起秋江近安得壺常監子提太元云監子提壺

送蔡孝廉佇蘭復午南歸

頻見征車瘦馬馱攀條吹絮意如何蒼苔苦惜同岑少芳
草偏疑別路多老去文章工感慨閒來歲月莫蹉跎荷花
七里山塘路歸聽吳孃暮雨歌

幾人摸索失曹劉局外虛令決勝籌剩把桂枝傳弟子猶
尋蓮幕客諸侯君家只自憐焦尾年少誰當讓出頭試取
灰盤供指畫山川隨地足清游昨與君言地理數事

寄家蓮浦孝廉

歲歲金鍼暗度人扁舟猶自滯迷津數奇豈必皆秦罪親
在惟宜惜政身鬢雪先秋非遂老君年四十髮已全白硯田得歲未

全貧笑他腐鼠成滋味浩蕩鷗波那可馴

寄藤軒偶成

且向鷓鴣借一枝打頭未要厭喧卑君看繞屋扶疎樹絕勝阿房五丈旗

市聲到耳尚人間五嶽愆期髻欲斑招得白雲簷際宿要圍幽夢入西山

細數春星掩畫屏月明花葉影瓏玲莫嫌藤本纔如指已有清陰覆半庭

喜雨寄蘭坡

百金能買羅穀貯千金能買臺榭處不能買取及時雨挾

得清風扇煩暑豈惟煩暑宜清涼萬事渴雨如瓊漿四月不雨已無麥五月不雨將無秧况聞微湖蓄水不及尺轉漕何以輸

神倉五更夢回雨奔放滴滴疎棚響清亮但覺涼浮枕簟間還疑身在江湖上朝聞百物罷居奇餅師酒保翻惆悵却憶前時屏號臻一雨霏微纔灑塵再雨土膏猶未勻及茲霰霽既霑足淨洗萬綠生鮮新人情待澤若有恃天心濟急甯非仁吾儕志願苦易足便擬裁詩報恩速西頭有客同襟期得錢沽酒好相促但願五日爲行旬日穀不妨泥污褐衣溜穿屋

爲亡友張阮林鈔所著左傳辨杜八卷成有感

吞聲惟死別念至增感傷招魂不成些月黑楓林長伊人
竟泉下玉樹埋清光遺書委篋笥叢雜希完章存此不盈
寸十載深膏肓微言扶賈服大義爭當陽相逢捉談塵往
往鬚眉張臨訣重諉誣在耳言難忘名山定何時夜壑倏
已藏摩挲託副墨技勘加鉛黃手澤付藐孤楹書實所望
痛逝行自念恒幹誰能常量已守竹素委懷望屋梁頭白
亮有時炳燭願詎償初昏見流火白露零濼濼鳴蟬發急
響蕙草棲餘芳掩卷不能寐中夜徒徬徨

爲龔若士編修題玉堂歸娶圖

三年待闕鴛鴦社萬里新開孔雀屏贏得爐香天上染雙
烟一氣上空青

金碧山川想畫眉十三驛畔馬蹄遲天台一種胡麻飯若

問劉郎定得知

君寓劉春舫編修所自貴州清鎮縣十三驛抵雲南界安平縣有天台山在清鎮西

昆池神劍合雌雄陰縵陽文出冶同歸向點蒼山下過好

將佳話證猿公

袁簡齋大令有乞假歸娶圖大令自言前身為點蒼山老猿

去年曾送謫仙才

謂李蘭卿舍人

又見天南掛鏡臺爲問曲江前

度事桃花應爲兩人開

七月五日同人集萬柳堂爲鄭康成生日致祭

司農北海天人姿六經絕業千秋師炯如日星麗雲漢亘

若河嶽環陬維巋然通德小天下炎精世亂羌獨治宣尼
夜半呼起起令人却憶生申時乾象之厯亦已改仰觀流
火無差池蒨菹束脯致精潔於粲灑掃陳祝詞想見冀州
高會日攝齋上座揚鬚眉太山太守尚北面何況六代沿
今茲吾儕落落苦難偶各抱遺經思不朽望塵十丈拜馬
蹄何如挾策隨車走眼花耳熱千金歡何似經神一杯酒
此間自是壇坫場相國風流百年後當時羣屐數難終彈
指園亭竟何有况復登樓思古情碣石沉淪憶來久君不
見白雲一片漢時秋猶照城東數株柳

夕照寺

亡友阮林
旅殯在焉

疲驢踏碎薊門烟歧路原知不在天詎料更番秋雨後槐
花零落殯宮前

偕魯三服叅游極樂寺時史大荔園何六弢甫以失
道後先不值

尋春不到國花堂應補詩篇入錦囊僻處寺能藏野色中
年人本愛秋光如弦直道猶迷轍傾盞殘荷已委塘幾度
車箱塵夢醒合來消受一爐香

萬壽寺

寺門臨大道驅馬常悠悠仰憩高柯陰俯送長川流何年
此締構剥落蟠虬洪鐘撞萬鈞夜壑潛移舟

寺舊有大
鐘今移于

城北覺生寺 石色黝已古松聲清欲秋縱橫布十笏窈窕成一

邱曠如隔埃盭灑若忘拘囚慮輕物易適趣協境自幽逢

僧話疇昔仿佛吳趨謳寺外舊有長衢列肆人稱爲蘇州街今已無之 屢里紛撲

地飛甍間朱樓門雞出西郭走馬臨長楸華軒逐水曲輕

蓋如雲浮繁華宛在目寂寞吾何求想像京雒篇眷念濠

梁游詩成定誰索會笑思湯休

贈洪明經櫛堂仍用前贈令兄筠軒州佐韻

今代鄱陽快拍肩鄂不輝映德星懸測量古度關經術商

權疇人入史編君通算學近日史館纂輯儒林傳梅定九薛儀甫皆有專傳 憶別梅花

剛嶺外筠軒以通判候補廣東 論文寒雨又尊前詞科故事君家盛

咫尺鑿坡豈杳然

寇白門小照

侯門如海忽揚塵尚有黃金贖此身却恐輕衫騎馬後嬋

娟非復畫中人

檀板紅牙紫玉簫秦淮風定夜深潮微波姊妹飄零盡明

月悽涼舊內橋白門與王微波姊妹皆居珠市近內橋

莫把閒愁訴落花殘山剩水獨知家黑頭江令歸何處不

逐春風到狹斜

歌殘金縷病沈緜枉自輸心託少年事見板橋雜記 解爲秋孌賦

腸斷多情惟有杜樊川

送歐陽棗龕衡出守吾郡

侍史薰香護錦籠專城三十軼憑熊早知名字題仙署應
有文章繼醉翁城郭至今如畫裏山川何必異涂中公餘
若訪都官宅烟水蒼茫望未窮

聞道哀鴻叫晚天南雲搔首苦憂煎那堪六代繁華習却
值三吳敝困年謝守蘭芬新馥郁沈約和謝宣城詩今守馥蘭蓀吳公棠

蔭舊連蜷

前守吳見樓先生于乙丑房師

爲言賈誼才疎甚遲獻金門策

一篇

蘭坡屬題霜帷課讀圖

前年展君圖憶君嬰媿襁褓中

君前有雪夜綳兒圖爲本生母趙宜人作今年

展君圖識君卅角初成童一母哺兒一母教知君恩重難
爲報可憐恩重遇亦傷螟蛉果羸皆孤孀讀書先識忠孝
字母言厯厯兒能記兒與尋常人子異一日不讀書誤兒
終身事一夕不讀書負孀十年志孀從未嫁已無夫兒不
成名焉用嗣兒跪受母言從此不敢窺門前獨不見干雲
棹楔門前路猶是兒時抱書處常令母喜莫令怒熨斗爲
兒作襦袴書聲振木木葉稀嚴霜入戶皆倒飛宮袍雖換
萊子衣讀書東觀勤思歸白雲下有宣文幃難將腸作轆
轤轉報得當年夜織機

晚行西郊道中

郭外盡衰草人烟寒不分病駝眠處雨哀鴈去邊雲客鬢
經秋薄鄉心入夜紛草堂時夢寐未要勒移文

送蘭坡假歸省親

長安居難竟若此十年宦達貧如水知君雖貧樂有餘寫
成千卷中祕書忍飢讀書亦自好却顧家山念親老况復
令原急難情人生那作桓山鳥君近有二兄皆歿欲居固自難欲
去亦非易一朝翩然策歸騎拙遲巧速百不計但博團欒
壹笑歡絕勝平安萬言寄開篋重檢遊子衣江南春好迎
人歸相逢白髮半新舊只有青山無是非山中風日釀春
色我亦頻年悔拋得丙舍荒涼麥飯寒夢魂欲去無南北

吾儕早合計行藏世事豈容偷食息旁人大笑謂我愚此
意區區君應識送君酒盡情有餘黃河冰開躍鯉魚大者
供馨膳小者可以寄尺書回車叱馭貴自審天寒善保千
金軀

贈查九峯 廷華 觀察

扶桑日出滄溟開隱隱萬里聞喧豨陽侯潛沸簸天地鯨
魚怒吼瘖風雷有時餘波息呀呷三山倒影無纖埃君從
海上來爲我說海真奇哉我思動靜互根極即此可以覘
君才一官海外苦拘閔何異巨觶膠滯泥沙隈鯤鵬變化
運南徙乘風破浪無衰哀君昔翩翩好書記運籌每叩囊

底智三窟馮驩豈代謀百函齡石無留事諸侯齷齪少當
意掉頭不屑遺鯖惠高牙大纛行及身得志甯忘天下計
人生行止難自知陸海波濤應更奇好憑忠信成利涉看
取抽帆到岸時

爲洪孟慈大令題城西話別圖即送之東湖縣任

一載東華契知君閉戶深勤修稽古業默養濟時心節操
承中壘風流託大琴由來覓循吏只合向儒林

輕裝戒徒御一舸上空舫問俗悲秦劫傳芭憶楚靈江從
天際白山入縣樓青別路懷芳草應知滿訟庭

題阮刺史小雲

常生

唵秋館圖照

家世今誰第一流桂枝生近小山幽瑯嬛天上真仙館賓
客淮南舊選樓萬卷好書常在眼二分明月正當頭遙知
清迴江山畔拍檻唵成碧樹秋

老圃花開弄影時花前頻坐倒金卮

前年雲臺中丞在都嘗招飲于泰華雙碑

之室極文
譙之樂

西江又數三年別北海虛叨一日知吾輩平生

幾兩屐古人懷抱數篇詩何緣更識郎君面攜手重看泰
華碑

夏至前一夕宿法華寺

鳴鴉催芳已樹中歸鴉投暮又城東鄉心倍覺牽農節塵
夢何由到梵宮剩有鬢絲饒杜牧漫將詩筆鬪盧仝

是夕月蝕

憑僧却話西山勝贏得香銷一穗紅

送葉生朝采省親臨汾

太行滴翠沾人衣白雲下向并州飛行人五月井陘度彼
汾一曲趨庭闈晨葩折送一回首三年兼玉相因依平生
結交多老蒼少年如子所見稀籥雲逐電不作意何異天
馬初脫鞮蝸廬鮭菜久相共移情詎必黃金徽七經東授
有餘術百城南面非空歸君家嚴君精吏事待驅五馬增
驂駢不須治譜問僧佑要取清德傳胡威少年幾時正須
惜魯戈縱利甯能揮汲古視力判深淺學道因心成瘠肥
我生最拙鮮長技平頭四十應知非嗒忘每隱南郭几矯

志欲佩西門韋俗人縣瑱付耳食名士畫餅充朝饑青眼
高歌更誰屬白頭傾蓋毋相違他時握手長安陌會須示
子杜德機

次韻謝向亭編修贈句

敢從稷下逞便便未熟南華第二篇苦被名山牽客夢難
將靈藥返童年風塵况味惟求友詩酒生涯不礙禪却笑
華嚴彈指易與君平地紮層輓

送范今雨大令澍之任高邑

百事都從齧菜根十年纔得解儒巾高談憂樂關天下信
手文章慕古人長者自多門外轍使君無改甑中塵相逢

却話冬烘樂記取當時面目真

君有敲得菜根私印頃每言及少年爲童子師事

垂柳毵毵覆

御橋馬蹄未算去程遙能令治行高三輔不礙風流似六朝家世豢龍休好畫昔時屠狗倘堪招昇平屢詔求良政知有丹屏在九霄

送張石蘭觀察師之任粵東

大瀛絡坤軸南維包粵甌烟濤萬萬頃微茫信難求孫盧一唱亂餘患貽千秋潢池盡赤子何至煩戈矛馬銜敢當谿致此蓋有由齒繁地力竭化失淳風媮長官本父母一且成仇讐民窮實盜本捕急重洋投陸梁更滿野表裏通

潛謀漁莊最貪餌藉寇誰干揪因之盜有恃刦畧無時休師老民重困閩粵同隱憂夫子昔持節海外觀九州擊汰渡澎湖長嘯驚陽侯是時妖氛惡旁午軍書稠內訌復多慝四境森斨鉢運籌妙鎮撫坐使刀爲牛侏儻請冠帶十譯開荒陬

謂哈仔爛初入版圖

乃知德感格能令金石柔盤錯試已

久餘刃恢恢游移旌今指粵忽復鞭螭蚪遙知鼎湖畔歡笑迎前騶珙也曩隄領正值鯨鯢收外甯思內弭蠹穴難全搜近聞稍萌蘖不治將潰疣所貴大賢詰變化觀鷹鳩國門盛祖帳風日張清秋浮雲豁萬里倏見南海頭細流豈足擇聊此先塗謳

積雨行城外有感

萬雉鬱嵯峨城濠飛雨過樓臺天外溼烟樹鏡中多老馬
泥塗歎平原敕勒歌油衣空自好將柰漏痕何


讀司馬相如傳題後

一自游梁賦子虛千秋夸誕此權輿詞人畢竟懷忠愛猶
有長楊諫獵書

聽烏圖爲鮑某題

黃鵠游四海徘徊思故林不及反哺烏啞啞懷好音願爲
依母雛不羨翀霄禽稻粱滿中野巢空難復尋朝呼暮還
噪惻惻傷人心秋墳鮑家子感此淚溼襟空言日中居莫

挽春暉沈引吭天路永斷翮泉扃深枯槎帶流水紙上猶
蕭森與鳥同不寐徹旦常悲唵寄言秦氏兒挾彈毋相侵



Handwritten text or markings on the right edge of the page, possibly a page number or a reference mark.

Handwritten text or markings on the right edge of the page, possibly a page number or a reference mark.

